

摘藻堂四庫全書薈要

集部

欽定四庫全書薈要

集部

陵陽集卷一
一至三

臣董誥詳校

詳校官助教臣謝登雋



欽定四庫全書薈要

陵陽集目錄

卷一

五言古詩

卷二

五言古詩

卷三

七言古詩

五言律詩



卷四

七言律詩

卷五

七言律詩

卷六

七言絕句
挽詩

卷七

雜著

卷八

奏劄表

卷九

記

卷十

記

卷十一

記

卷十二

序

卷十三

序

卷十四

序說

卷十五

題跋

卷十六

題跋

卷十七

題跋

卷十八

啟

卷十九

啟

卷二十

啟

卷二十一

劄子

卷二十二

祭文
祝文
青詞
疏

卷二十三

上梁文
樂語
詞

卷二十四

行狀 墓誌

臣等謹案陵陽集二十四卷宋牟巖撰巖字

獻之父子才宋端明殿學士禮部尚書在理

宗時稱為剛直宋史有傳巖官至大理少卿

入元不仕閉戶三十六年故其集中九日五

言詩序論陶潛于王弘中路具酒食事及題

淵明圖諸文意皆自寓巖又嘗云世喜稱淵

明入宋書甲子無年號黃豫章亦曰甲子不
數義熙前然今陶集詩本無書年號者淵明
恥事劉裕大節較然此未須深論嘯之言如
此故嘯文中間有用至元年號者意本此也
子才本蜀之井研人後以蜀亂不能歸淳祐
中居於湖州故嘯為湖州人因多與趙孟頫
錢選周密倡和然其集猶取蜀所居之陵山
名曰陵陽蓋尊本思舊之意也嘯別著六經

音考元時最有名今已不傳嘯子應龍元史
亦有傳蓋以文學世其家者集為詩六卷雜
文十八卷前有至順二年程端學序王士禎
居易錄謂其詩有坡谷門風雜文皆典實詳
雅今觀所作知士禎之論非誣矣乾隆四十
三年二月恭校上

總纂官

臣紀昀

臣陸錫熊

臣孫士毅

總校官

臣陸費

墀

陵陽集原序

文者言語之精華也因其道以有傳然古者文以道傳
後世道以飾文古之人有是道然後托於文以達之道
若斯文亦若斯故其言約以實是謂文以傳道易詩書
春秋論孟是也後世不必皆以其道亦欲為文以自見
道若斯文不若斯故其言支以虛是謂道以飾文文士
之文是也然則終不復古乎復古有道道弭乎中不得
已而有言文斯復古矣故周程張朱數君子者出而太

極圖說西銘易傳語類諸書不在中庸孟子下誰謂文不可復古乎亦在實之而已矣西漢之文道雖不醇大略言由事發猶近古也自餘隨其人品以為重輕若諸葛孔明陶元亮杜子美陸敬輿韓退之歐陽永叔蘇子瞻曾子固數子者其忠義直諒磊磊落落有以自顯於世而其文亦可相為不朽至如司馬相如揚雄柳宗元王安石之流其聲音步驟蓋亦無媿乎數子然予不知讀其言者視其人何如也由是觀之傳道之文與天地悠

以其次與其人重輕下此猶榮華飄風而殫一世之力而為之者惑也故元初陵陽先生牟公懾博學實德為時名卿天下之書無所不讀古今典禮無所不攷其源出于伊洛其出處有元亮大節故其發於文章淵深雅淡從容造理其法度之妙蓋有與歐曾並馳而其實則有道之言也天下後世當有慕其人而重其文誦其文而想見其人者矣端學自史院歸田于鄞公之次子浙東帥府都事應復景陽甫在鄞出公詩文若干卷將鈔諸

梓屬端學序引自惟庸陋生晚于公無能為役其敢贊
一辭然亦嘗登公之堂而識公之容亦嘗誦公之文於
學者所傳且得交于景陽悉觀公之著述非幸歟敬附
一言以識予之幸若公之德業文章則不待贊也至順
二年八月朔從仕郎前翰林國史院編修官程端學序

欽定四庫全書薈要卷一萬五千九百六十八

集部

陵陽集卷一

元牟獻撰

古詩五言

東野平陵圖

鞅掌不可耐壯士縛申卯驅驢古平林水木樂幽茂苦
吟到斜日危坐類持釣俗情見擺落鵝雁極衆口兩曹
第恣之適滿百乃報吾終不以此而易彼升斗小裁鶴
料案官事竟未了斯人坐詩窮咎在虧天巧有如發其

罽為謔豈不暴理宜得嫌憎枵腹鎮雷吼區區尤李氏
此頗天意不

趙春谷約游北山次陳本齋韻

病士痼於懶舉世少匹亞未省讀道書低頭蒙絳帕夢
想北山北戶限久不跨折簡許我游籃輿暫相借腹鳴
肩自舉悠然謝銜鞞邂逅得水竹神明湛吾舍山亦紫
翠橫了不費要迓平生赤兩脚城市所深怕何妨巖石
間共永一日暇高情偉卓犖不在古人下喜客見着宇

煮茗掃風榭老仙澹一癯龜息聞靜夜攝衣倒凌景回首憐俗駕吾儕偶會弁小語輒雷咤風雨萬慮清詎肯隨物化商山尚局促而况彼畦夏

東坡九日尊俎蕭然有懷宜興高安諸子姪和

淵明貧士七首余今歲重九有酒無餽而長
兒在宜興諸兒蘓杭溧陽因輒繼和

吾翁始落南土思尚依依築堂扁岷峨目斷落日暉憶昔丙申歲錦里烟塵飛甲子已一週而我猶未歸孤蓬

金少日人卷一
失本叢旅雁抱長飢百年直寄爾曠然勿徒悲

驚飈舉落葉意氣何軒軒秋高百卉盡寂寞但空園何
異富與貴變滅隨雲烟緬懷陶彭澤平生極幾研朗詠
貧士詩相對如晤言今人之所耻古人以為賢

我殆勝彭澤無酒亦無琴湖外來遠餉屋角嚙好音吹
帽節已迫醉鄉路可尋勿違故人意洗盞起自斟甜酒
乏風骨谷永與杜欽而此清且勁良足慰我心

人生徒自苦與世為卷婁何如有美酒自獻還自酬貧

雖不若富用寡庶易周婚嫁願已畢此外復何憂况無
下澗田得與彭澤儔年豐米長賤一飽或可求

翁媪老白髮蕭然老江干大兒荆溪遊折腰豈為官諸
兒走異縣亦各營一餐別多會面少端復坐饑寒諸幼
具眼前笑語開我顏勿問賢與愚懷抱俱相關

好惡豈不察鑿垣植蒿蓬而此庭前菊鋤灌少人工此
物抱至潔有似楚兩龔留香待嚴凜意與烈士同糞土
笑伯始金錢鄙鄧通千載一元亮舍此將安從

兩山南北峙四水貫此州登臨豈不嘉出門自寡儔客
鄉幾重九歲月如奔流蕭然具果飲聊以散百憂平生
和陶集韻高乃敢酬乃復咏歌之歲晚葆姦脩

和程漁莊救燕

燕巢屹高壘蛇行危折磬不虞猝見侵怪事發軒屏黃
口養漸大紫翩翩相映雌雄力難護吞噬氣方盛豈不
避戊巳天意特未定主人勇赴救為惠固當竟蜿蜒墮
尺箠折首甘所迎古人致陰類嗜好用具性此族遭炮

燔往往多天橫人固異於物縱暴胡忍聽試看自古來
善者終必勝羿殞莽亦屠曾莫保軀命報應各以類豈
不信可証驅而放之菹是乃三代政姑用柳子言鋤吾
草萊徑

題淵明圖

并序

淵明九日無酒坐宅邊菊叢中意殊寂寞江州刺史
王茂弘諸孫已荷朝寄猶知有賦歸去來者能於此
時遣白衣擔酒遠餉邂逅一醉大是奇事集中九日

詩僅兩首無酒則曰塵爵耻虛壘寒花徒自榮有酒則曰何以稱此情濁酒且自陶而王茂弘所餉已酉九日十有九年畧不見詩集何耶此翁志節耿亮與秋俱高往往逃於酒而寓於菊二詩之作一感一喜微見於意固不暇於歲歲皆詩此中有真意欲辨已忘言正當求之言句之外可也此幅筆雖簡意有餘輒和己酉九日韻述其事醉中看畫未免發千古一笑

平生抱耿介四海寡朋交
淒其九日至頗感顏髮凋
無酒醒對菊風味乃更高
誰識此時情白雲行遠霄
地主有佳餉得得良已勞
而我適邂逅赴飲如沃焦
永言大化內朽質非所陶
惟有飲美酒一醉可千朝

九日

并序

陶公再為建威參軍劉裕幕府也忽棄去屈為彭澤令未幾又棄去裕是時已有異志劉穆之寧死不與九錫事王弘自江北來首以此事風朝廷裕遂移晉

祚而弘為吏部尚書為江州刺史遂被心腹之寄既
來江州柴桑近在境內於陶公時惓惓豈非內懷前
媿欲拔高人勝士以自湔拔耶彼曷不知名節之為
高也陶公未易致則使人中路具酒食候其出醉而
要之庶幾一見斯蓋已甚迫則亦可以見吾胸懷本
趣固有在豈端為一王弘哉適乘籃輿足以自返其
視華軒為何物而弘欲以此榮其歸此又可笑也前
是論者偶未及九日蕭然因賦數語

秋風颭以至今日重陽日明明對南山尚想陶彭澤向
來建威幕頗見有此客驅車不少留駕言公田秫如何
又棄去此意誰能識寄奴趣殊禮風旨來自北只今王
江州建白功第一故是僧彌孫舉動殊足惜飲媿望柴
桑稍欲自湔滌殷勤白衣餉猶恐不我即中路候籃輿
要致已甚迫葛巾赤兩脚頽然向州宅此翁本坦蕩焉
能苦違物一時可計取中實未易屈華軒有何羨自載
返蓬華終身書甲子凜凜義形色如使磷且緇安得為

玉雪籬邊有佳菊
弄黃正堪摘
我方持空觴
千載高風激

簡趙子昂

君維大雅姿
被服藹蘭蓀
曾次綜流畧
本本又元元
手追七子作
凌厲氣所吞
餘事到翰墨
籍甚聲價喧
居然難自藏
珠玉走中原
四年郎省戶
小滯當高騫
肯來為多士
復除布春溫
力爭吾道回
中流收崩奔
眷言維桑舊
從容駐輜軒
我亦喜再見
一笑畧寒暄
首誦新詩章

兩耳為君尊高情殊磊落俗子何足論顧我寂寞地無
物當贈言乃復攜尺紙看君醉墨翻霜木石共老野竹
翠不蕃落筆頻申頌歲晚古色存思君時一把此意期
勿緩

和趙子俊閒居十首

俛仰一室內我興尚無為凝塵澹素几乍見閒居詩吐
詞甚高簡觀者未必知士固各有志肯為富貴移汲多
羸其瓶居然井在湄何似鴟夷全張弛隨所宜楊子不

違物趙子不干時此意諒所同相與三復之

窘步殊蹢躅戶限久不踰若或繫維之媿彼空谷駒俛
馬念平生我亦酷信書所得不償失每與憂患俱飲水
飯脫粟此意豈願餘貧實為我累舍貧將馬如堪嗟嗜
利者死甘諡為愚

維昔陶元亮早歲尚隱淪從事建威幕奔走戎馬塵宵
征亦良苦我豈戀軒茵時運不可回物態日以新悠然
彭澤去漸與鄉里親公田半稅秫亦足慰我貧有人企

高躅漫仕求所伸
閩嶠雖云遠絃歌遂其真

九日忽已過霜薄陽光晞
未漉頭上巾先典篋中衣
時物尚有菊採掇頻爾稀
對酒胡不飲坐看白日飛
五勝更囚旺萬事誰是非
且復進一觴酒盡情依依
晚蝶抱孤蘂無乃昧先幾

勢利苦炎炎名節貴皜皜
河縣開桃李家園熟梨棗
當年歸騎省名譽豈不早
一染金谷塵蕭艾沒芳草
胡為閒居賦乃諂任安巧
所以惟慕陶固窮而守道

金夕四八
卷一
我亦愛閒居好山環屋青拄頰坐來久冉冉白雲生山
中有三秀誰為采其榮散我腰脚頑使我神觀清

我居殊偏仄東西鑿兩牖卧起於其間不知歲年久秋
菜上墻生廢圃一何有只應谿上人笑我已白首橘柚
非所種勸我且種柳也莫種牡丹與物爭妍醜

閒居維弄翰窓明庭戶寂硬黃力追古旁觀共歎息當
由結習深疊疊向晨夕持用自怡悅而不為物役但恐
好事者逸少混鐵石我能別真贋一紙百金直

衣短不及髡髮短不滿梳惟有憂世心皇皇此生俱鮒
魚呼轍中微濕以相濡斗水旦夕急豈與人意殊試誦
反招隱願無懷故居墨突何曾黔行矣勿踟躕

人生與出處要不失其正手捧毛義檄以為庭闈慶祿
養有甘旨東西惟所命賀客來何多踏破蒼苔徑再拜
稱壽觴閭里生新敬

米元暉山水

鶻突烟樹外水遠山更長天地有如許扁舟何處藏如

何短篷底結習猶未忘是時水月繁不見此夜光于今
尚無恙懷袖行可將我亦流落者此味慣所嘗誰能畫
我堂坐我於其旁

十月既望能靜飲客海棠花下即席索詩走筆
一笑

久聞使君歸扁舟欲自載竟負九日約吾意良有待今
朝得得來適與佳辰會名園盛衆卉搖落不少愛為語
玉林神無乃風景殺春葩發霜枝一夜作奇怪此花紅

濕處無如錦城最，衝來定鴻鵠。萬里從雪外，高情相煖。
熱置酒出花背，固知是鄉人。豈不在我輩，西莊見西產。
一笑心領解，主人獨妙年。有花正宜戴，胡為亦見分。無
乃嘲老大，誰令開非時。故遣白髮對君，勿輕白髮髮白。
老更耐洛陽，劉伯壽耆英典型在。醉帽仍挿花，豈是兒
女態。還以壽主人風流更耆艾。

羅漢臣拄笏亭

爽氣鍾于西峨，睂橫太白。春風吹不煖，暑路有積雪。月

照平羗冷雲頂七頂濕游戲兩謫仙銀河洒醉墨遂令
漢嘉郡千古占一色一從殊方走江山頗蕭瑟流落各
天涯相逢未相識微聞莊烏吟握手話疇昔乃知此邦
秀終不斷地脉權門車如霧衆甘炙手熱而君獨幾先
惟恐浣我笏偉哉百尺樓西望即鄉國爽氣今已回何
妨高拄頰里中表聖公千載推汲直當年幾諫紙扣笏
良鯁切意欲摧百士死職非所惜此笏豈其遺正自峭
風骨願君善藏之擊邪看他日也勿羨堆床富貴竟何

益長鏡白木柄乃我手中物惟有故鄉夢與君共愁絕
何當駕雙鷓萬里遡寥碧

文本心叅政約游西山分韻得頂字

僕僕事行役度盡千峰頂恣覽亦云倦困卧殊未醒西
爽俄見要前約欲重訂結習若猶在寧復計兩脛天際
豁輕陰溪頭橫短艇揮手謝籃輿信步躡荒徑適意自
忘遠迷途誰為詞此翁平生意故自畧畦町何妨一笑
回呼僮僮煮茗兩年已三至我如飢黿鼎無乃太屬厭

徒欲逃醕酌老筆忽先倡高標誰與並尚記去載游金碧光炯炯何處非吾鄉一氣相滓溷

送姚子敬

方聞興秀孝父矣無令舉公車冷於冰吾已棄如土提書向孔墻萬代禮樂主而與先簿正厥有聖法寓士也得所歸至窮亦云遇於惟京類舊幸不生蒿穰斯文諒在茲天意豈輕付之子抱淵靜蕭然守環堵光彩難自闕珠玉滿囊褚一從鷲表飛諸公共稱許如何但熟睨

引鼎力不武棲遲冷掾間無乃太廉取相縻共升斗端
欲重鬻宇勿嫌屋打頭碑兀氣未吐六月取一息千里
始跬步期君在遠業看君即軒翥風雨忽道別恨恨寡
悰緒從今閉柴荆何以慰哀暮

題張老山從好堂

世有嗜土炭恣啖等梁稻海上逐臭夫自謂姣且好好
惡一失正萬境眩顛倒亦有欲富者蠅營無不到洗削
誇鼎食執鞭甘隸阜於此還有人深恥貨賂冒一笑視

千駟貧賤守以道厥好豈爾殊吾自有至寶但恐好不
真回奪諒難保老山殊絕塵褰裳衣欲縞區區名與利
何曾挂懷抱世人定不愛昌歎與羊棗吾意各有在端
未恨枯槁從好以名堂一室聊笑傲心惟有所好乃能
無所好好仁者夫子不知歲年老益晚而好易易編窮
所好彼富如浮雲非義是所悼諒茲得其從聖言極探
討孰重復孰輕辨之亦既早而我方忍饑四壁淨如埽
舍魚取熊掌因用做哀耄

十日菊為子昂壽

風露浩如洗漸覺霜氣滋九日已成旬黃花爛盈枝誰
云清香減清香在詩脾詩人亦未老皎皎冰雪姿為我
掇繁英和露三嚙之此物是壽耐千載以為期一點綴
鬚髮真是麒麟兒長大著膝上綵衣相娛嬉

臧子雲袖詩見過且篤敘先祭酒與先人同朝
之雅意甚古用韻為謝

白髮祭酒公儀刑古君子多士所共敬豈獨桑與梓吾

翁幸同朝輦路時並轡流風日以邈追慨徒倚徙子雲
篤世誼竭來自攜孳念我一破廬落落荒城址遺以五
朶雲置之五雲裏我是老祠官未忘鏡湖水握手更細
論書味淵以旨嘉問有青衿十載詩千紙

西崑使君上冢過雲首訪敝廬又會能靜話舊
感慨情見於辭所以道別

自為盱江行最聲日飛馳赤子問襦袴白雲滿髻髭
邊重會晤握手惻所思舊有隴岡表三讀起懦衰迺翁

平生志正在造膝時曾擊賊腕悍曾疏公田欺曾陳峴
山急或訝語太危移疾逃相印何忍張悌為全歸干戈
際一致眎險夷象賢有令子紀實無溢辭刻之並纂疏
自足永久垂憶昔姑孰守欲碎脫鞞碑博士何偉哉奮
身力護持麤沙與大石彼計竟莫施遂令兩圖在留作
千載竒此事關世道磯激我匪私他時記先友要當附
見之顧我窮未死僅存骨裹皮殷勤締衣貺古道其在
斯無物當贈策遠大以為期願勿忘吾州歲晚託茅茨

和德清曹魯郊七十一吟

元日書甲子曉繁問五辛頗記絳縣老宜有善頌陳君
平生是歲早晚戰伐塵明年七十二舊謀無糾紛斜飛
滯棲枳旁觀嘆積薪欸乃來澤國比屋多嘖呻何由躋
壽域君勿開荒榛遺以大有年在在鼓腹人非徒事勾
稽耄稚情日親溪流甚清泚鵝山亦嶙峋胡為動鄉思
便欲乞其身駕言登東山遐眺窮屋垠有時于沂浴庶
幾遠俗氛平生布衣舊方今鼎鉉臣挽留不聽去好語

温如春悠然復少住終惠此邑民九十以珍從八十起
渭濱如君老益壯眼明無眵昏精力殊未衰齒宿意自
新盍陪英俊游可是枯槁倫而况二三子左右參魚鱗
從翁取青紫且姑置垂綸憶昨初相識氣象清以淳而
我已索如髮短不可耘蓬廬辱再訪頓覺雙眉伸大笑
向我言六甲那解輪惟須飲美酒分餉良已勤珍重君
子意自酌不及賓和氣何益益喜色何津津長我梨與
棗平地即仙宸勿使他饋傷小大相參辰載誦長短歌

尤足夷我神倘來視富貴高情渺浮雲想其下筆時健
能幹千鈞君倡我當和樵髭簷屢巡向來九老集往往
多沉淪亦欲相從去病憊力弗臻似聞紀初度先我十
二旬看君詠薰風笑我醉霜旻所期在千載天地見本

真

蓋其生五月
予九月也

餞潛岡南提舉

君前郡文學端自吾州始壇坫日以高到處執牛耳平
生洒落胸作事故奇偉飛上南樓去坐得數千里全楚

帶五嶺古俗甚豐美一昨干戈後或未識瑚簋禾穰生
黌宮學士氣如洗此行纍佩印良為吾黨喜三閭屈大
夫四海習鑿齒堂堂始興公亦從韶石起何地不生賢
幸勿遐陋視著意絢荒餘文物中州比况復多蜀客誰
其顧瓊尾相與噢休之我頗念桑梓垂老猶惜別何以
當馬箠願君為廣廈庇天下士

栢生兩石間千歲終不大韓子則欲移之平地
以遂其生栢生兩石間天命本如此蘇子則

欲安之石間以全其生二說若異然韓子愛
惜人物以有用者也故又曰傷根栢不死千
丈不難至蘇子愛惜名節以自保者也又曰
雖云生之艱與石相終始愛栢一也雖然處
險難而出險尤難金華倪君老儒也以栢山
自號因取二公意賦詩寄之

栢生兩石間平地盍移置平地豈不好又恐傷生意兩
翁為栢謀其慮各已至受命獨也正固與凡木異夷險

獨爾殊而我本一致但能全其天所擇不在地我聞栢
山名抱藝久不試自種秋栢實離離滿山翠石礎曾不
傷地平亦不肆歲月漸婉婉冰雪幾凌厲此栢初不知
老大見根抵一笑謝兩翁何者為榮悴

送洪竹堂

家住西湖西愛吟仍愛竹富貴豈不好變滅如轉燭一
昨流落後破垣竹猶綠往事何用訪得此良自足胡為
被書誤彈冠向苔曲三年飯脫粟不飽而况肉頗有青

矜子對之尋舊讀時復吐佳句家山如在目不知竹是
伴誰護蒼玉束官滿還滯留欲歸未可卜無錢買扁舟
遷居更勿促悠然謝此君行止任遲速新年雨雪深忽
已歸期告天公似有意為爾開晴旭士固不可料窮久
理當復東風吹浩蕩萬里奮鴻鵠

贈姜醫

越人嘗遊齊後世多名醫漢時太倉長亦復出臨淄子
實同鄉里兩翁諒所師從今雪川水飲者不厲疵

贈日者薛東湖

抱疴蓬廬下白日背我馳我生已如此天命復奚疑悠
哉東湖水不迎亦不隨相對澹無語可以樂我饑

陵陽集卷一

欽定四庫全書蒼要卷一萬五千九百六十九

集部

陵陽集卷二

元 牟巖 撰

古詩五言

和德問弟苦雨

鶉鳩朝喚晴竹鷄莫催雨
脩脩晴雨間平生睡足處
剝啄忽以詩使我浪愁苦
此事屬天公底用強如許
淋漓不得休土偶復於土
君何見之晚三嘆詠集
相不如兩忘言危坐擁
敗絮向來夏畦勞抱甕
漢陰圃旱澇相乘

除天地只此數為我語老農未用輕喜怒使有二頃田
亦欲荷鋤去我評昔遜世幼安勝根矩毋為苦近名江
湖多數畧但看來榮者隱約殆終古彼以膏自煎謝去
非吾侶無已則沮溺躬耕諒所取吾儕固長貧正坐力
不武所營薄少耳搏沙尚難聚却笑杜陵翁欲把漏天
補胡不歸自謀颼颼破茅宇天邊金老鷄已放晴曜吐
馬嘶羣動起吾惟守環堵

和無逸子敬獨姥山

維址呀洞戶雲氣一縷烟老龍蓄精祐萬石護其巔從
此叩林屋倒翻水中天金庭漫隔凡窮探未擬旋轟飈
四面動兀坐孤寂然頗疑北山脉跨湖潛屬聯歸來夢
所歷跳波撼晝眠種橘化為枳我髮日已宣何時菴邊
路去伴毛公仙獨姥舊聞名俚俗訛已傳一朝得妙語
塗抹乃更妍天姥似失色葉姥休語年而我復自笑槁
乾非葉鮮聊以調二士鼓棹還延緣

和善之遊龜溪乾元寺

疇昔侍吾翁尚記入雲年米麩家家釀蒲荷處處田龜
溪見鶴林欲去遭挽牽借屋度長夏對床時醉眠或登
左顧亭風物清且妍回顧一甲子往事隨奔川翰林左
綿秀宮錦不上船肯尋兩翁遊來弄明月泉弄泉珠麗
袖吟詩箭脫弦是誰修月斧斲地成空穿猶有半泓碧
奈此筆如椽乃知宇宙內小大常相懸惟堪供我輩古
瓦生茶烟雲乳聊一啜松風灑禿顛

和善之遊法華

勝游得勝士欲濟得健艣如此正自佳寧論晴復雨徐
行者前山雲氣互吞吐借我烏藤枝急奔青蓮宇跋躑
良亦疲蘧籐可能俯呼酒酹此脚一笑失枝拄吾懷已
曠然阿香殷餘怒床敷相對睡不暇叅佛祖晨光報新
霽生色浮宿莽諸峰忽自獻頗自作眉嫵絕頂瞰具區
勇往不可戶而我跛躑者遲鈍誰比數窘步竟難陪內
熱生心腑龐通遠相要淵明喜欲舞籃輿叩隱廬趺坐
直香縷四士苦未還踏破辛夷塢俱是青雲客那得薄

圭組新笋甜如蜜新茗白勝乳山靈倘見容吾欲老茲
土預愁下山去塵事紛旁午試問白木鏡何如長柄塵
他日蒙萊把終當作地主此翁無乃癡統如已五鼓

真隱詩

招隱費招呼習隱聊習步素隱為素餐克隱似克數悠
悠千載內罕與真隱遇少小慕真隱每誦坡老句竭來
法華遊正在題詩處真境忽在前更慕坡所慕真則思
慮泯不真精爽驚真則光塵合不真圭角露真書無歌

仄真味無反惡真樂無安排真逸無疲苦所以要任真
從其訝箕踞所以貴葆真從他笑椎魯但看真隱廬蕭
然只環堵青山以為屏白雲常在戶隨宜種花藥快意
掃庭宇可作真率會可說真實語可飲真一酒何者非
天趣玄真乃詩流季真是仙侶拉之相與俱巾屨此容
與坐聞雛鶴鳴時看蒼虬舞踈散畧邊幅誰客復誰主
吾亦忘吾真酣歌下山去

俞好客又號菊莊為賦數語

人生自作計北屋連南莊其間復何有積粟埋屋梁敢
村有退士用意獨異常種菊一萬株規作歲晚糧老農
與老圃工勤畧相當春雨茁陳根柔莢綠於秧剪翳披
厥穎葉盛在本昌啜之付茗椀聊誑藜苒腸秋高飽風
露粲粲枝間黃使天而雨金不可以為糧此賜何敢慢
再拜然後嘗接滓不勞咀迸入牙頰香三噉下丹田字
之曰黃粱其情性具烈毋以他饋傷為爾制頽齡使爾
壽而康彭澤有公田秫種半頃強正使及秋成所得亦

已涼奈何不少恣決去驚鴻翔百匝繞東籬米來不盈
筐高吟發清哦持此送一觴珠玉實其腹千載有耿光
子亦慕陶者閉戶歌慨慷但得三徑存何慮一莊荒老
我飢不死誰與辟穀方作詩聊以贈一笑為發棠

鄉曲諸名勝不鄙老朽移樽見過風誼甚古語
笑甚歡輒借昌黎人日城南詩韻少見謝意
人生貴合併造物忌嘲弄頗與同社闊正坐兩脣凍南
城七日遊前事諸賢用但愁茅屋陋不足置賓從此會

豈偶然歲月日時共

皆壬寅

四癸義可取三壬老堪送况

有蹇東陽初不減潘葑渴叻久已燥樂飲宜一縱笑談
更温克容與非倥偬永言戢厚意拜嘉敢不重

李千秋訪數語代謝

昔有孟萬年脫帽狂不休今有李千秋吟詩醉愈道我
久聞佳句一面苦未酬殷勤忽過我意氣殊相投能道
太白語便可大白浮清論或抵掌烏紗猶在頭而我已
頽然頗有此樂不偉抱自卓犖下國難淹留同來玉雪

郎外家乃名流好歌鳳將雛飛上丹極遊

宣和御畫紫芥

荒園老蔓菁空見根葉大苦硬螫人口棄去何足賴
穰來萬蟻微醒有餘嘍

岳君舉用東陽法釀酒味頗蘊藉長兒携歸偶
得數語

昔屢飲東陽往往錯認水次公似少猛汲生終戇耳知
我野心性雅不便軟美契闊二十年那復此風味飲酒

真飲蜜直欲嘔心胃兒從南塘歸殷勤有佳遺公等久
要在相看猶故意曲江加蘊藉鄭公殊嫵媚一見極傾
倒吻渴不能止正性固自存遽莫測其際徐覺和以諍
雖勁還可喜酒固未易知知酒亦非易酩酊何適從不
夷而不惠

德清孫氏和樂秀明堂

人生致足樂莫如令兄弟綽綽而有裕其中自春意龜
溪有二孫能篤友于義同居五十載闔門數百指幾微

無間言輪囷有和氣粵從鴻雁散惟恐棠棣廢欲挽古
道回茲事良非易亦既成新居始得遂初志和樂揭高
扁秀明屹對峙怡然兩白髮損篋伯仲氏子孫皆雍睦
閭里亦順悌復如無事時難得真可貴唐史傳孝義頗
記張劉李跡其屢易世往往干戈際義風不少衰大書
乃無媿嗟哉廣明后旌命曾弗至雖有篤行者誰為紀
姓字我聞二孫名不覺為之喜兩記信實錄聯名盡名
士先見衆論公必得一行史行看表門閭鄉邦誇盛事

我詩甚鄙拙願爾多壽祉

贈俞山月

童奴從長耳萬風聲蕭騷歸從半山路問字良亦勞
聞餓虎嘯喚醒平生豪前山忽湧月始覺所見高
頽然有遠孫載酒江湖教胸中湛水鏡邂逅得所遭
古月還相照了不隔秋毫但憐露草濕時復暮蟲號

送唐同知

平生一寸心神遊夢華錄喜君晚相遇風景宛在目肯

為此邦來大是渠儂福我但飲若水生意已俱復軋軋
寒女手何事嗟空軸欲去復停車為爾兩眉蹙猶是前
叔度五袴回餘燠千家萬家喜吾意始云足路穩驅車
去祖帳紛相屬賀下不賀上此語傳古俗况携善頌歸
親舍喜可掬魚羔傾家釀懽聲動隣曲麾節願早還春
風棠樹綠

適安齋

天圓如旋磨萬古幾曾息日轂環之走西陞俄東出聖

賢法天運所以長汲汲大禹生胼胝孔弗遑煖席客寢
何太康人或規不及亦有功名者齋內運甕百不放身
暫閒苦欲勞筋骨如何適安齋燕處甘暇佚此齋匪侈
麗易安取容膝竹几對藜床左右置書冊有時值佳友
從容遂竟日體適任屈伸意適任語默惟其適之安適
且忘吾適向來孤山老保此踰耄耄以安遺子孫此計
固已得人生天地間何事非吾職夜思晝所為然後安
可即况君抱修能當念踵前業相期在萬里無從守一

室精義以致用龍蛇豈其蟄

次韻程晉輔

一宿蘧廬托百事弁髦棄平生意何如猶動沾沾喜我
喜在丘壑富貴非所睨况子好山居泉甘野芳媚鹿門
時上冢了不慕城市或嫌人村遠知一未知二試看近
市者事奪紛夢寐正墮膠網中展轉悞身世舉手謝逋
客士固各有志結習奈已深坐上謾同異山空陰綠淨
長日惟宜睡夜半呼僮奴發火燃枯蒂滿紙詩已成文

采一何麗墨池漲玄雲晴窻藹微霽自子來此山與山
相昆弟又將三昧手於馬小遊戲向來蜀之日往往召
狺吠迫爾付一喙千載息攘袂變滅今安在但有山繞
翠可憐七十翁嬉遨尚童稚坐聞酒如川留客爛熳醉
亦思翩然去芒屨踏初霽就林煨短茁帶泥落花蘂清
絕恐無分得已吾欲已那堪迫暮末來日能餘幾城外
土饅頭區區誠過計卓哉荷插翁曠達未可毀

仲實示中秋詩甚恨不同此樂用韻一笑病中

殊無思也

誰其持冰炭晨夕闔我庭遙哉水帝后乃有此寧馨不受百藥鑄奈何頑且冥是時八月半無雲天正清居然作灾怪流汗如翻瓶捕逐出八荒弱步愁闕而子方

寘酒賓主更醉醒作詩調明月顧兔下乞靈飲量聞小減猶能吸南溟客疾掃已空蕩蕩白雲扃何必徼淵明若問神影形吾生七望八臍胸知幾經不樂復奚為羨子鬢未星何時定一來眼中見鸞停軟語到夜闌發火

金匱要略卷之三
卷二
烹中冷誦子新詩篇我亦能靜聽

同賦開元宮避暑詩

避暑如避虎山林每逢旃誰知浩穰內自有清靜緣同
來戴牟張作計良亦賢是時正流汗赤日行中天勞坐
苦役役何異烹忽煎居然得勝地神觀為爽然涼颺起
珍簾妙香汎瓊篇坐客易生感泉隱獨談玄靜者躁之
君方寸湛其淵勿謂火勝月此意諒默傳我戶隔珠庭
遙企玉真仙仙遊雖云邈肯逐大化遷曲池况未平中

多蒲與蓮更有離離者使我增愁涓

次韻仲實秋夜

空庭兩犀株吹香滿前軒頗疑顧虎頭幻此金粟繁或
是乘鸞女月窟分天根更與瀉浩露盡洗蜂蝶喧若無
好事者為我載一尊而我子張子古誼夙所敦肯將新
詩句到我羅雀門何殊小山賦欲招楚客魂犀首纍佩
印陋矣不足論老我罕出戶東牆甘曝暄應同花下醉
式副我願言

送家自昭長慈湖

眉山鍾神秀翁季天下偉直到仲虎輩奕奕殊未已家
為文章家百年兼兩侍存翁名侍從願山古膚使秘書
性具存文脉益遠迤前除羅玉樹乃復有令子超趨愛
不羣老氣壓紈綺早歲瑟僴篇短檠午夜几要渠紹編
刻教示正勤止家寶未輕出吾儕方側耳一朝着斑衣
束書事行李堂上白髮翁為爾顏色喜濤江日日靜酒
酣可以起慈湖在何許精廬屹其址我欲鼓枻游浩渺

曷涯淡長風駕高浪瞥忽可千里如此寧不超踔厲前
無以須知歸宿處其道元甚邇鯉庭尊所聞固自有源
委願母厭凡近讀書愈窮理修程與遠業亦從今日始
合沓來衆譽烜赫繼世美持以貽家尊良足當甘旨

贈陳一齋

謝公文物郡山川如錯綉轉眼成蕭瑟富覽寧復有自
我識君子再挹中嶼秀卓犖妙言語經術更兼茂早歲
六典書嘒嘒發孤味春官失分寸苦不入吾彀天意將

有待本郡煩客授鄉人弟子行月旦師友舊朝隨貢篚
入莫處儒席右固知致遠業當時無近售多士皆景附
三道共輻輳而我初何心高下隨所就澹然守吾一擁
書坐清晝交帚謝俗物冰雪凜懷袖獨於吾輩人倒屣
惟恐後誰云一縫掖不如鴈門守好賢篤緇衣同心藹
蘭臭况乃諸老翁夜艾耿殘宿殷勤見尊禮能使風俗
厚頗憐世議隘或用儒為詬元氣須愛護大體必爭掄
誦言百僚上大作萬間覆君當自此升儒蘊獲盡究是

為斯文福豈第神明祐平生聞人善喜氣如饋餽作詩
繼魯頌千歲俾眉壽

送王仲明長明道

君本鄴中士行向建業去故都多感慨盡在登臨處乃
心所師仰當年上元簿閉門玩微言春風會歸趣

和馬侯游何山

自還吳興居頭童而齒豁信意時出教所覽深以廓何
山在何許細路穿木末躋攀不憚勞歷歷見郭郭晴嵐

堆紫翠正在吾屋角世事苦空並我但專一壑嗟彼競
利者為計自各各緬懷安定公雅合居臺閣平生惟自
道未有輕造脚榻從海陵來姑蘇亦暫泊湖學得公重
學子有攸託南園慶歷間六老曾會酌當年馬太守高
誼誰能若直卿為之記文字誠磊落厥今同姓侯曾次
有活著長篇俄寫就傳寫腕欲脫昨聞上湖墳寒色正
錯莫樵木不為禁宰樹嘆濯濯新祠已卜龜華表佇立
鶴神游倘來下曠達離塵縛

送呂錫入閩省覲

吾友鄧善之從游多佳士其間最妙齡英英有呂子虛
中風寒處子獨鍾秀美憶昨初過我丰度如冰峙不肯
逐利名惟耽玩文史閉門肆探討往往窮日晷刻意逗
幽深飛辨摘譎記我欲濬其源融液會衆理何事遽索
去明發事行李八詠須恣游三山亦甚遂人生着綵衣
侍官真樂只行當拜家慶親顏為渠喜非復舊阿蒙有
子能如此便可置膝下家室勿輕視

聚星堂

并序

穎川周宅有聚星堂世但傳歐蘇白戰詩句晦翁在建安固作新陳氏之考亭始繪荀陳聚星故事於屏上攷訂指示甚詳且為之贊世或稱先生為考亭蓋誤贊中一語若不滿于膝上長文文若二孫者然其意則為侂冑發也陳氏乃晦翁之孫故曰課忠責孝獨慨余衷此橫幅意亦是時所作以便卷舒爾今考亭已燬而此本獨傳於世豈偶然哉曹士開博雅士

也能寶藏之因識于下方云

建武重名節狂奴態猶故客星復何事一夕感乾度風
聲激未造駢首死黨錮而五百里內乃有賢人聚行行
望德星高陽里中去德隆則星昏時網不足與元氣之
所全政在簪盍處乃知忠賢類天每下其顧二老甘隱
淪四海起尊慕有如子孫行已是廊廟具深期任世道
相期扶國步皇路方險巖傾輶當急赴赤手徒捧塊詎
障奔流怒濡迹本棊時其忍諉諸數事盖有至難竟乖

天所付汝南榜堂皇考亭繪縑素室有聚星事四遠競
傳布老眼苦昏暗見畫如隔霧卷還坐太息冰炭擾百
慮

史彥明致樂堂

高堂有壽母黃髮映兒齒天方畀修齡康寧燕多祉怡
然人子心何物堪倫比和氣為愉色皆自深愛始郁穆
涵春風融怡妙天理此是謂至樂樂則焉可已再拜為
獻言忠養極娛侍隨時換輕煖每侍進修澹初非假外

內至樂皆在此況能以志養先意而承旨鮒鮓故自珍
懼不如菽水有時平反歸兒喜親亦喜吾以名吾堂致
樂義最美試看紀孝行昔曾今日史會有邦人士升堂
奉醇醴俾爾登期頤俾爾宜孫子

次史德載韻示諸孫

我家無絳帳貧賤人所棄忽聞唔呶聲老懷倍懼喜比
隣亦驚怪捩眼不敢睨先生史魚直自謂骨不媚珠玉
在短褐深藏未輕市而况門閥高指不屈第二肯應童

蒙求為爾覺昏昧袖中一卷書傳之自名世爾幸近得
師盍勉從學志人品分中下教法初無異采芑復采芑
我田自新美那似斥鹵濱彌望荒白葦短園圍敗屋不
見花藥麗賴此小窗明晴光開霽霽日長書好讀所講
先孝悌泥牛共土狗勿復事嬉戲後池蒲稗深竟日羣
蛤吠也勿向池邊照影如孔翠低頭勤筆硯翻墨滿裾
袂男兒十四五年紀非幼穉不妨笑阿翁憤憤長如醉
先生有雪霜嚴威不汝霽今朝發長吟閉門苦覓句老

年謝丸藥殆似陳無已區區古人心今人知者幾乎生
潁川教不作功名計但令本根在浮華終易燬

侍輅院叔過山廬意行甚適夜過半乃知醉卧
山中而親友或去或留因借淵明時運暮春
篇一笑

宿戒親友蓐食詰朝携幼偕往歷覽江郊鳴吭在谷時
雲在霄灼灼桃華青青麥苗且行且扶且憩且濯橋有
危躡湖有遐矚古人惜春常若不足又一月多何如其

樂狷者隱淪狂者詠沂千載彭澤異致同歸匪怨匪荒
天趣發揮大阮靜淵心慕以追暑嬉我林夕偃我廬或
醉或逃聽客所如林墮片月室耿殘壺一笑成詩良非
起予

再和

摩肩趨利市門之朝夷然抱關市也亦郊一念靜躁懸
隔壤霄旱火未焚實煖我苗飲冰內熱其何能濯大播
昧昧近或弗矚我有至境反觀內足寂寞寬閒自得其

樂茫茫禹跡海岱淮沂遊子倦矣故鄉如歸牛羊在野
舉肱一揮既入其笠夫又何追八荒我闔天地我廬六
鑿何有一席晏如西風籬落剝棗斷壺靜以觀復閉戶
者予

陵陽集卷二

欽定四庫全書薈要卷一萬五千九百七十

集部

陵陽集卷三

元 牟巖 撰

古詩七言

長江圖

漢川影落鸚鵡洲
金山鐘到多景樓
老龍幾載卧寒碧
中間不斷萬古流
晚來雪浪大如屋
澎湃舞我一葉舟
舟移岼轉知何處
離離烟草令人愁
說與渠儂莫倚柁
轉帆別浦盍少休
此圖此景俱可惜
展玩不足空白頭

家在江水發源處何時還我舊菟裘

山水圖

凝塵不去鼠行几劃見巨然與千里修眉拂畧遠意開
碎點孤煙樹如齊髯龍鬱鬱新翠搖我覺鄭公殊嫵媚
懸知自是棟梁具歲晚霜雪須飽試舊聞北岳鍾馭寒
長松造天冰裂地蒼皮玉骨不受凍礪砢千丈世絕擬
誰能為我試貌取竒姿偉狀來眼底張君平生飫所見
雅復愛此秀而美雖然莫作差池觀老壯險夷同一致

鳳凰山澗石圖

南湖山人小戲劇夜半釣天聞拊擊音節疎宥鳳起舞
至今筍簏遺樅業君來訪古用此時地老天荒何處覓
矻矻渡盡澗與岡确犖徑微子趾棘重華忽已三千載
鳳鳥一去無消息石兮石兮奈爾何搔首湖漚徒佇立
羣仙拍手相勞苦但知簸空吸寒碧殷勤問翁今何如
方瞳炯炯映丹頰頗記三生石上無讀書雙趺雨苔澁
歸來舉似翁一笑飛鴻踏雪那可憶子其為我謝羣仙

不妨天遊復八極袖中行記真畫圖留向人間作奇特

題洪崖先生出市圖

洪崖先生住何許支離擁腫之為伍蕭然行李偶出市
東書瓢劍畧可數自謂生在三皇前野鹿標枝何太古
當時但以結繩治書中正復作何語輿馬絡頭亦復來
雪精胡為馬繼具只呼張老無不可面謾三郎直戲侮
承平無事相娛嬉力追遐風來湛露一朝恍惚思草昧
此意似已厭繁膺干邛萬落荆杞生宛是洪荒一風土

袖中紙驢不吃草拍手還向洪崖去

王維畫孟浩然騎驢圖

窮浩然老摩詰平生交情兩莫逆也曾携去宿禁中堪
笑詩人命竒薄只應寂莫歸舊廬此翁殷勤殊未足作
詩借問襄陽老詩中猶苦憶孟六悠悠江漢經幾秋一
夕神交如在目分明寫出騎驢圖丰度散朗貌清淑更
有個儻一片心不是相知那得貌行行復行向何許酸
風吹驢耳卓朔向來十上困旅塵驢飢拒地愁向洛不

如乘輿且田園萬山亭前大隄曲鱖魚正肥甘蔗美鷄黍可具楊梅熟一樽相與壽先生醉歸勿遣驢失脚

和王寅甫御史遊南山韻

平生愛山苦趼足況此對面美冠玉也曾杖屨極躋攀
稍度灣碕轉虛曲徑踏青螭脊上行所歷漸高山漸東
紅亭白塔出湖外下瞰諸峰等臣僕祖禪晏坐服生獐
法席宏開儼清肅何人梵唄呼僧定劃然透戶如擊筑
浮嵐暖翠忽紛披依依精舍傍修竹至今猶作呬唔聲

飽食頗慚空洞腹崎嶇竟日亦已勞應接滿前端為目
道人對境了無羨折脚鐺中煨脫粟小立為爾起深悟
願事埽除甘播掬崢嶸歲月苦難記三寸稗杉俄立鵠
山中老宿亦向盡訪舊無人空感觸細評道人似豪家
臺殿耿耿枕岩谷當時氣象雄一方誰教劫火燒糜竺
十年舊觀未全還金錢奔走傾緇俗何山試問何所有
一溪清泠嗽寒綠入門使我意也消不省人間有華辱
殆是高人勝士徒山靈笑許茲論篤曠蕩幽深兩俱勝

胡不重游勇奔鹿多病歡娛久去心良辰美景寧相屬
昏昏午窗供坐涼跳丸西走白日速夜來可奈風雨盡
盡力催花亦良酷痛殺新紅三萬片園林慘澹餘老木
作詩遣愁愁未遣那知翻作愁根窟古人真欲焚筆硯
苦語殆可書紳笏頗憐阮屐共嵇鍛更笑周妻與何肉
留連一物即是礙羨君開襟少頓促愛詩乃復宜相似
句語卓犖光透幅倦還始覺心和平人生有手莫操牘

送陳正德教諭常熟

此邦自是高陽里陳太丘家好孫子十年閉戶養雋聲
我先子後一時起前時送兄今送弟綵衣拜親親為喜
人言昆令而季強羨君清標如玉峙善和尚有千卷書
一一窮探親夜几新詩那更翻手成便當拾芥取青紫
小營甘旨束書去且煩私淑青衿士天公應念友于情
任國相望纔尺咫蘇州明白照兩縣正好高吟清影裏
吳江定作對床留笑隔垂虹鱸鮮鯉托好我已三世深
待老敢當二生侍蕭蕭風雨起送客萬里飛鴻看雙背

端明老子舊家聲一舉先鞭從此始

楊求仁路教遊何道山之明日余始自洞庭歸
恨不與雋遊漫趁韻一笑

君能匝臘過茗水我正絕湖尋橘里人生有數會不免
先後差池數日耳天教新年暫相見握手如獲丹與砥
畧似德公上冢回徑入就談傾底裏如聞前月清興發
杖藜曉對南山起蒼官掀髯自虹舉清流照影時鵠峙
我歸已晚不得陪脚中平生信有鬼獨留詩卷使我和

思枯預怕搜脂髓小溪深處是何山藏機一句無多子
當時言下誰領會只認泉石為對履至今遺跡記東坡
遂使此山同畏壘擬議固已輸一籌躋攀銳欲窮寸晷
真境不樂有無間更使高人為標指先生醉歸方熟睡
凍蠅一任鑽故紙

和顧伯玉陳朝檜

長城大雄古刹裏一庭老栝質已死依約僅見左紉紋
垂柯布葉乃如此相傳云是陳朝檜欲論往事皆死鬼

冰懸雪跨黃塵盡何煩
阜茨相料理只應孤根鐵石堅
不怕如壺之赤螿四旁那復有
生意生意却從中心起
陳氏機淺根枝弱雖有子孫何足倚
崢嶸霸業隨手壞
五傳不堪重屈指君語居然多硬語
千載興亡雜悲喜
隋唐而來尤可感區區未數錢與李

寄閩靜齋徐容齋二學士

代人作

斯人宗工國司命容齋有容靜齋靜海涵岳峙俱偉人
心同道同不同姓向來先後持玉節共仰福星在吳分

一公歸領集仙班一公繼登六鰲禁大名本是宰相職
高塞書帷地步峻導密亦是翰林長快埽槐廳消息緊
天教兩翁轉鴻鈞赤子到頭合蘇醒東南秀士願不乏
當年著意極搜引而今造化沉在手想見姓名猶見省
石生已起有溫生我愛莫助德恅恅苦為百草憂春雨
坐待風霜發苕穎

善之入雲蘭臯置酒小詩紀坐中事

病翁禁酒仍禁脚不省人間有行樂主人善最客善之

邀我來同鷄黍約清樽快吸船落球頗悔從前謝杯酌
故人久別如此酒一時傾倒慰離索更擘新笋供春淘
狐泉槐葉未須學殷勤入鼎煮過熟老饕恣吞不勞嚼
人生難得是合併開口一笑良不惡呼車載我雨中歸
阿香推車散飛電分明戒我輕破戒故把春衫都濕却
我亦投床作雷吼無數殘紅枕邊落

倒撐魚船上灘圖

倒撐魚船逆上溪六鷓過飛風退飛呂梁懸瀑行越之

灑灑如象人西歸一笑恬視險與夷同波委順未必非
趙石心詩

試問吳兒歌小海何如廣平賦梅花一片石心元不死
平生不落徐庾家趙子陳陳有胷府雲根半夜生槎芽
有時盤空吐硬語更覺世上浮且夸誰能為熟青藜杖
苔莓荒盡天祿與辟邪

贈劉心月

心月還將眼為月秋空表裏俱澄澈閱盡世間姪與妍

分明無處藏毫髮我方回向心地初含光自照非外謀
平生最喜阮嗣宗臧否兩字何曾說

送陳正德長慈湖

并序

陳正德甫本齋端明公之孫姿稟穎異而氣象峻整
與其二兄無逸正則相後先克持世業蓋本齋師蔣
實齋友湯東澗而聞之魏鶴山真西山者也師友緒
言講之甚悉以選為慈湖山長兄無逸取東澗送本
齋教授金華詩和之以送而送者亦皆和焉楊文元

自號慈湖在慈溪其鄉里在樂平其仕國遂有兩慈湖相望千餘里慈溪之慈湖其在樂平之慈湖否耶不可知也或謂莫妙乎吾之心之神變化無方俛仰之間再拍海外安知慈溪之不樂平乎然則正德之樂平也亦且三月聚糧撰日而戒行乎告行於嘗所往來問途之所出孰為近遠乎其既至書院也亦且循序而進歷階而升堂乎集其學者正席而登義乎正德曰若是者固知之且慈湖每舉心之精神是謂

聖者語其徒亦未嘗不曰孝也敬也實也忠信也誠使學者極高明而道中庸下學而上達盡心知性而知天其有不至於聖也乎予深異其言夫義理無窮其是非疑似不過毫釐之間講去其疑而求其是可也昔呂成公平亭而議陸氏之學以為勇於求道之時若不由階序然毫髮之偏不敢安兼聽並視却立回顧不造於至平至粹之地弗措其語可念也蓋以是求之焉遂和詩以贈

本齋之孫盛詞華下視流輩十倍過家書雖散尚千卷
其奈儲無儋石何二昆研席相與共勘辨不遺毫髮訛
一朝束書慈湖去慈湖之學自象梭人之高明騫高遠
不由梯級陡上坡而其下者保固陋終歲無路登嵯峩
萬形惟實乃無弊此道自古傳思軻慈湖論心論無我
真意初不煩鐫磨虛明一語更超絕不肯與人同其波
却笑禪宗用心錯我每讀此毋麾哦微言日絕諸老盡
獨抱永感如宿疴君家詩友講貫熟持之以往豈在他

我耕我獲粒我腹而彼徒夢笠與蓑

題喊泉亭

大龍小龍天下絕水簾高掛三千尺呂梁懸水那復言
便應壓倒棲賢峽我來覓水洗雙眵怪底老崖枯欲裂
龍公何處抱寶眠悶蓄精枯未渠泄誰知水火本無根
重陰可以陽氣徹倚空長嘯山為開以虛為感感尤烈
千山巔巔方沍寒鍾乳淙流忽飛發珠璣噴薄雜霏霧
瓊瑤傾瀉濺白日若非捲取銀河水那得變幻在呼吸

看泉須看無泉時自無而有乃奇特龍公作事真狡獪
吾儕用意亦竒崛經營小立看未了洞門忽已雲霏濕
龍公龍公可以止何如翻手作飛雪便將豐年報明主
蒼生赤子俱函活火雲六月汗如漿更為渠儂洗炎熱
一笑回首謝龍公神用俱停天地寂

再和楊求仁何道二山韻

雪堂西席雪江水廣文先生是鄉里此翁平生事崛竒
欲上虛空鞭馭耳邇來深藏老鋒鏑未許容易試越砥

挿天光氣尚歷歷若為着渠岩石裡
仲華本願郡文學
百年功名一日起崢嶸今不少自貶
吾道毋乃太孤峙
苦將新句調山靈不遣陳迹蹋死鬼
世俗貴耳不貴目
誰得其皮兼得髓翰林主人墨客卿
會將此事全付子
吾衰正復何所用兩錢之錐漫苴履
固知梅老難抵當
夜半偏師來研壘襍硯囊筆俱堅坐
爾以不戰淹客畧
天地凍合萬木僵軍中頗怪多墮指
春風呼酒為解嚴
十部從事賢一紙

律詩五言

和孟能靜總管西莊閒居九日見招

風物居然好亭池穩處安上饒初奏最西墅且追懽朗
誦詩千首高眠日幾竿放懷聞孟浩乘興過蘇端近局
人人喜閒居事事寬扶筇差可強投社亦非難歲月期
鮐背功名付鼠肝相將斟壽斝一笑拂塵冠紅蕾春猶
小黃花晚更寒摩挲話銅狄惟許鶴來觀

張彥清學士以使事來杭訪問忠烈王子孫蓋

其先皆自保定原系實同迺合二譜聚族謁
廟叙拜厥誼甚古仲實賦詩以紀錄寄山中
輒和之

有偉秦咸望厥初保定人風雲際興運茅土褒勲臣端
自積餘慶非徒榮一身聞孫藹令譽抗志矯秋旻嗜學
今該古問安昏復晨金方感義氣內譜存宗親膚使光
華盛輜軒采訪頻迺知清廟器俱是崑山珍分派既同
出馳聲尤絕倫仙班重典領宥府久彌綸揭節方宣化

揮毫看爽神應嗟遠俗薄欲挽古風淳鉅族同三眷高
情隘八垠焚香肅遺像序拜欣嘉辰頗屈彥清貴寧嫌
仲實貧綿延百年緒翕合一家春樂只飲此酒勤哉書
爾紳尋盟諒愈篤蹈道毋胥淪暫別山河阻終期事業
新相從萬里去伐鼓起通津

和梅君遇退閒

鞅掌徒勞耳人皆羨子閒惟甘寄市隱勿苦憶家山街
鼓晨眠穩丹田夜氣還蕭然無一事意已出區寰

贈厲白雲上人

雙徑聞鐘罷而今但熟眠事須紅日上身在白雲邊古
貌應違俗高吟不礙禪爐頭煨芋火相對各欣然

羣羊踏菜畦戲作

活計元堪笑毛羣尚見欺蹴蔬元匪夢樊柳竟何裨正
爾敗諸葛從何捉左慈若鞭其後者猶得養生規

次韻八詠樓

八詠樓中景都從筆下收使君容此客詩卷重於舟我

頗曾三至君應倍四愁
瀟湘與章貢千古只同流

贈葉一山

氣岍有如許當年乃鷓冠
覓官談笑易知己古今難
膊聳如山瘦心堅可歲寒
郎潛有顏駟博士却儒酸

題詩禪方丈

切忌犯正位須教截衆流
聞鐘應已悟縛律未為道
室小纔容膝詩成自點頭
出門忽大笑明月一天秋

仲實踐約來訪又得韶甫方君同行數日語蟬

聯甚慰五詩寄意甚高次韻為一笑

重脰嫌卑濕那堪暑雨稠
拋書事藥裏欹枕聽溪流
何用攄孤憤惟宜號四休
誰能訪生死天際有來舟

江河去不息金石仰面觀
但未隨流轉安能制汗漫
親情人所重友誼古尤難
二士俱來意遙知可歲寒

紅帶承顏色青霄奮翮時
猶尋雲弁約肯為水亭嬉
快婿豈嬌客老翁真小兒
五噫且勿作舉案樂齊眉

陽羨長腰米儋州禿髻翁
相傳作佳話好為表遺忠
收

檻溪山勝從容詩酒中南湖未歸客歲晚倘來同
平湖好亭子高出亂雲層一水作之字衆山羅豆登襟
懷為爾豁杯勺尚能勝却笑鑽故紙窗中效凍蠅

答術者

賢闕抱多士子獨抱遺經衣尚舊時褐眼誰今日青直
須行萬里未許赴三星會友誦佳句等閒生鶴翎

送吳古邨入越

笑我甘苕隱因君動越思綠波元可鑑縞髮已成絲共

說修齋老仍懷閱道時
匆匆還別去江海入新詩

次韻寄衛山齋

蜀客嗟留落甘為學圃
逢年華空自老心事復誰知
未有益簪日還須上冢時
諸餘何足論相對但期期

送周東甫教授餘干

并序

太學賢士之闕異時英雋如林
冠蓋如雲眎功名富貴可立致
一旦高舉遠蹈携書入山林
惟恐其不深且密也蓋久之而稍稍出為時用何進之難耶然流

落顛頓之餘尤為人所愛重譬如珠玉犀象之珍要
未易煨歷之也吳興周君東甫以前太學諸生教授
饒之餘干州人皆謂此未足以處東甫也東甫笑曰
曩使吾幸而久於太學或四三年或五六年又甚者
十餘年以得一第而又幸在前列法得為學官須次
且數年幸而得至其官豈有異今日之為哉而何所
寘淹速喜嘆於其間迺亟裝為行予聞而壯之以東
甫辨博而文通敏而能何適不宜况博士非冗官可

行其志餘干非陋邦可施其教行矣東甫久鬱者其
發必大其進孰禦子姑自愛重敬修其可願以俟其
遠者大者焉是邦自忠定公以及近世之諸賢緒言
餘烈尚有存者詩云高山仰止景行行止敢以是為
贈言詩曰

博士廣文館遲君二十年新邦重於越舊俗記諸賢

謂古

心榭峯東
澗碧梧

鷓首南風至臯比右席專暮年尤惜別搔首

意淒然

和雨中

但聽四簷滴真成萬事休空邨就誰飯高樹繫吾舟那
恣田翁笑還憐木偶流老人渾忘事畧記酉年秋

薄宦亦良苦救圻泥濺裘陳紅猶不足大白幾曾浮賴
有兩詩好聊寬一日憂天公應念此未用祝篝甌

水邨圖

山色濃還淡孤村水逸之俗塵飛不到野老住偏宜碣
岸疎疎柳茅簷短短籬小舟歌仄過便是少陵詩



陵陽集卷三



總校官進士臣胡 榮

校對官中書臣吳 俊

謄錄監生臣胡觀瀾